人伦大统赋

(金)张行简 著

目 录 · 1 ·

目录

原序	01
卷上	02
卷下	12

人伦大统赋 .1.

原序

夫阅人之道,气色难辩,骨法易明。骨法者,四体之干, 有形象列部分,一成而不可变,欲识贵贱、贫富、贤愚、寿天, 章章可验矣。至於气色通於五脏之分,心为身之君,志为气之 帅,心志有动气必从,气从则神知,神知则色见,如蜂排沫, 蚕吐丝,隐现无常,欲别旺相、定休咎,于气色则见矣,非老 於是者不能。若精是术,必究是书,是书蔓延於世甚夥,苟不 抉择而欲遍览,犹入海沄沙,成功几日。善平,金尚书张行简 《人伦大统赋》与芟诸家之冗繁,撮百世之机要,提纲挈领不 三二千言,囊括相术殆尽,条目疏畅而有节,文辞华丽而中理, 其心亦勤矣,是以初入其门者,未免钻仰之劳,仆触僭窃之非, 以鲜闻管见,附注音释其下,仍括诸家之善以解之,目之曰音 注集解,庶使学者有所依藉。然而知面之部分,莫知适从,亦 徒劳耳。面图世传者多指龟为螯,近获郤阳簿李庭玉所图面部, 凡六其部分,行运气色骨法纹痣至真且悉,其义愈明而意愈彰, 可为发踪指示之标的也。故弁诸赋首,庶学者披图按赋,相为 表里,决人凶吉如示诸掌,可谓胸中天眼不枯矣,岂无补哉? 虽然,获兔鱼必由筌蹄,能乐学必兴其艺,有心于是,而欲齐 唐举之肩,接许负之踵,谅亦不能不自此始尔。皇庆二年苍龙 癸丑端阳日秋潭薛延年寿之序。

卷上

贵贱定於骨法,忧喜见於形容。

〔凡人贤愚、贵贱、修短、吉凶、成败、利钝,皆定於骨法也。骨为君,肉为臣,骨肉欲其相辅为贵,若露骨肉薄者主於下贱。忧喜乃未来之事,人莫能知。忧喜未分,则气色朝夕发於面部,青忧疑,赤口舌,白哭泣,黑死墓,黄喜庆。〕

悔吝生於动作作之始,成败在乎决断之中。

〔悔吝者,吉凶未见,人情虽知喜利而避害,莫知缘害而见利。《易》曰:吉凶悔吝,生乎动也。成败者得失之本也。 人之所谋当刚断而不可狐疑,故举动所谋能决则必成,少疑则 事乱。〕

气清体赢,虽才高而不久。神强骨壮,保遐穀以无穷。

〔气清体羸者,谓之形神不足,常以不病似病,虽有文学高才,终无远寿。人之寿夭皆在神气骨法所主,若神强骨壮,必享远年之寿。〕

颜如冠玉,声若撞钟。

〔冠玉者,美玉也。人颜色要莹然温润,若美玉无瑕乃贵。 钟声良久不绝,人声发於丹田,贵乎深远。若浅短蹇涩破散, 夭贱之相也。〕

四渎最宜深且阔, 五狱必须穹与隆。

[四渎最宜深阔,崖岸有川流之形,不为漫散破缺。五岳

人伦大统赋 3.

要有峻极之势。〕

五官欲其明而正,六府欲其实而充。

〔五官者,一口、二鼻、三耳、四目、五人中,欲其明而端正,不宜孤露偏邪。六府者,两辅骨、两颧骨,两颐骨,欲 其充实相辅,不欲支离孤露。〕

一官成十年贵显,一府就十载富丰。

〔此五官中但一官成就,则享禄十年。此六府中若一府就,则十载丰足。〕

房玄龄龙目凤晴三台位列,班仲升燕颔虎颈万里侯封。

〔唐房玄龄龙目凤睛,则三台显贵。汉班超燕颔虎颈,封 定远侯,镇抚

万里之外。〕

英眸兮掣电,豪气兮吐虹。

〔英眸者,瞻视俨然,目若掣电,眼如鹰视,转瞬之余谓神彩射外也。豪杰者,言词磊落,志气峥嵘,若吐虹霓。〕 若赋性凶恶祸必及,如修德惕厉禄永终。

〔凡人赋性凶恶,祸必及身,终当暴死。若人常能修身慎 行,则禄位永保其终。〕

上长下短兮万里之云霄腾翼,下长上短兮一生之踪迹飘蓬。 蓬。

〔人身腰长脚短,如躭雕飞翔霄汉,摩空万里之资也。人 若脚长腰短,则一生踪迹飘零流落,老於他乡。〕

惟人禀阴阳之和,肖天地之状。

〔人禀阴阳正气而生,诚与天地参矣。〕 足方兮象地於下,头圆兮似天为上。

〔足欲软而厚者,乃富贵之相。天尊地卑乾坤定矣,故足 方象地,头圆象天。头圆足方者富贵,头小足薄者贫贱。〕 人伦大统赋 .4.

音声比雷霆之远震,眼目如日月之相望。

〔音声者,人之号令,可以及人,故曰如雷霆之震。\$天之日月能照万物,人之眼目能知万情,故眼目犹天之日月也。〕

鼻额若山岳之耸,血脉如江河之漾。

〔鼻额必如山岳之耸直高隆,可为入格之相。人周身血脉 昼夜循环无穷,故如江河之漾。〕

毛髦兮草木之秀,骨节兮金石之壮。

〔毛发若山川草木发生。图南曰:阳气舒而山川秀,日月 出而天地明也。骨节宜若金石之坚固。〕

欲察人伦, 先从额上。

〔人禀三才,额为天,颏为地,鼻为人。天圆则可贵,当 先视其额,额主君位,故为天也。〕

偏狭兮贱夭足恶,耸阔兮富贵可尚。

〔额骨偏斜窄狭侵天部,当夭寿贫贱,亦为足恶之人。额 若高耸广阔,则富贵俱全。〕

若见伏犀之骨定作元臣,如有额道之纹决为上将。

〔伏犀骨起,印堂至天中隐隐骨起,直入发际,光泽无破, 必在公侯之位。额道纹者在左边地至右边地,横直之纹如刀痕 之状,别无纹理冲破,定为军帅大将。〕

右偏母妨,左偏父丧。

〔日月角为父母宫,左为日角,右为月角,左为父位,右 为母位,右偏主妨母,左偏主妨父。〕

山林丰广多逸豫,边地缺陷足凄怆。

〔山林在天仓上,若此部丰广主平生多悦逸宽。边地在驿马上,边地驿马为迁移宫,若有缺陷,则破散成败可知。〕 覆如肝而立如壁,寿福实繁:耸若角而圆若环,食禄无 人伦大统赋 .5.

量。

〔额若覆肝而平,或如立壁而直,则寿考福厚实多也。额高圆而日月骨起,主高贵长命。凡人之额,其耸若角,其圆若环,主食天禄以终天寿。〕

尘蒙而身无所资,玉润而名高先唱。

〔额若无润泽之色,如尘埃蒙覆,则无頠石之储。额如美玉之温润,主声闻清高而先显早第。〕

丰隆明者生必早达, 卑薄暗者死无所葬。

〔额丰隆,光泽色明而无破,则早岁登科。额小窄狭,其 色昏暗,或诸部又无所辅。则死无衣衾棺椁。〕

福堂之上气黯惨,幼岁多屯;驿马之前色黄光,壮年受 贶。

〔福堂部在眉上,气若黯惨不明如尘垢者,主幼年屯滞。 驿马在边地下,眉毛后有红黄色者,壮岁受君赐。〕

色贵悦怿,纹宜舒畅;贫薄孤独,曲水漫浪。

〔颜色贵乎悦怿不宜气杂,若有纹理可尚者,宜乎舒展敷畅。乱纹薄额纵横相交谓之曲水漫浪,横纹为人平昔多忧,主贫薄孤独。〕

居侯伯者偃月之势,处师傅者悬犀之象。

〔谓额有双峰,上如偃月,王公侯伯子。师傅者,三公位 也。额有悬犀,其悬犀骨在福堂上,高隆若角,直接山林。〕 鼎足三峙列三公以何疑,牛角八方厕八位而无妄。

〔鼎峙三足者,额有伏犀、日月角俱起,若鼎之三足,定列三公。牛角八方者,盖额有八角,乃伏犀、日月骨边、边地骨、福堂骨、龙角骨、虎角骨、牛角骨、印堂骨,有此八骨者,必登廓庙通达八方。〕

观夫眉字宽广,心田坦平。

人伦大统赋 .6.

〔眉为紫气吉星也。若眉宇宽长平阔者,则心坦然无私。〕 狠愎者低凹其骨,狂狷者陡高其棱。

〔性狠之人则眉骨低凹,若眉陡高者狂狷之人,故知进而不知退,知存而不知亡,恒有包藏之志。〕

粗厚鲁愚,秀浓慧明。

〔眉之粗浓浊厚者,其性愚钝多滞。疏眉秀有彩者,主聪 慧才智过人。〕

短不及目者贫贱,长能过眼者宠荣。

〔眉短於目者,主身质下贱。眉长过目者,则身荣贵显。〕 尾散者资财难聚,头交者身命早倾。

〔眉毛毫毛脱落而疏稀,主财物破散,初运二十六至二十九财散。印堂乃命宫也,若眉头相交如蜻蜓之形,毛侵印堂者,短寿之相。〕

中心直断惠性少,两头高仰壮气横。

〔眉中间直断或纹破者,其性寡有仁慈。眉尾谓凌云,主 人之气志。眉若两头高起,则有丈夫之气。〕

毛直性狠,毛逆祸生。

〔眉毛直生者,为人性狠,亦主横夭。眉毛逆生者。其人 恒有灾害,亦当克祖,主凶恶。〕

覆目软柔而少断,偃月高揭而好争。

〔眉八字软柔压眼,终无正性,故为无断之人。眉若偃月 高揭者,则必好斗而多争。〕

扣促无开,伤蜉蝣之短暐;毛长及寸,享龟鹤之遐龄。

〔蜉蝣喜阴而恶阳,人若眉头促锁短也。印堂终日不开者,谓之鬼形。故叹其若蜉蝣之影。眉长及寸者,谓之寿毫。四十以上生者,得其寿考,必享遐龄之庆也。〕

十字高品,天文大亨。

人伦大统赋 .7.

〔两眉间印堂上有纹如十字者,主有高位。若纹理似天字者,一生亨通,纵有灾咎,自能消散。〕

作坤字者禄二千石,成土字者将百万兵。

〔印堂有纹作坤卦者,则禄享千石。成土字纹者,当帅兵百万。〕

列土分茅由玉田之高朗, 纡朱曳紫盖水鸟之圆成。

〔有列土分茅之贵者,谓印堂中有纹如玉田之字。纡朱曳 紫之官,盖印堂中纹如水鸟。〕

欲察神气先观目睛, 贤良澄澈豪俊精英。

〔人之神在目,夜则神寤於心,昼则神游於目。欲察神气 虚实、心术美恶,必当先视其目。故观其外者则知其内。贤良 之士,眼神澄澈若水;豪俊英杰之流,神和惠而黑白分明。〕 性端正者平视无颇,情流荡者转盼不宁。

〔人秉性端正,则平视不侧。心情流荡之徒,则目睛往来 转盼不息。〕

黄润定至於黄发,白干终至於白丁。

〔瞳子黄润,可至於黄发之寿。眼若白干而不秀。终作白 衣之士。〕

顾下言余叔向知其必死,视端趋疾魏主见乎得情。

〔昭公十一年秋,单子会韩宣子于戚,视下言徐,视不登带,言不过步,无守身之气,死将至矣。此年冬而单子果卒。智伯师韩魏之兵而攻赵,城降,有曰智伯之臣昚疵见桓子与康子俱无喜志而有忧色,昚疵谓智伯曰:"二子必反矣"智伯以告二子。二子曰:"此夫谗臣,使主疑懈于攻赵也。"二子出。昚疵又曰:"主何以臣之言告二子?"智伯曰:"子何以知之?"昚疵对曰:"臣见二子视臣端而趋疾,知臣得其情故也。"〕神陷短寿,睛凸极刑。

人伦大统赋 .8.

〔人之寿夭,皆在於神气所主。若目神已陷,必当夭死。 睛凸者,谓之蜂目,其人必至极刑。〕

斜盼者人遭其毒,凝视者自克其形。

〔斜盼之人,谓眼神侧视,必遭毒而亡,或至兵死。神凝 不秀,转盼无力者,虽面部青显,自克无禄也。〕

淫眼神荡,奸心内萌。

〔淫乱者,眼神流荡而不收。狡佞奸罪之人,目神若尘垢之蒙深,不可以为交友。〕

睡眼神浊而如睡,惊眼神怯而如惊。

〔目神浊者,不清也。如睡者,谓神困浊无力,终当夭寿。 惊眼者,谓视物急而惊,其人当至暴死。〕

病眼神困而如病未愈,醉眼神昏而如醉不醒。

〔病眼神困,谓情倦如久病未痊,其人终无远寿。醉眼神 昏者,神力倦怠,恒如带酒,必至服毒而死。〕

豁如视而有威, 名扬四海; 迥然惊而不瞬, 神耀三清。

〔神藏於豁视,威严而有力,俨然人望而畏之,主声名播 扬於天下。人若偶遇不测之惊,眼神澄然不改,盖不染尘俗之 汗,出於造物之外,是谓大贤之相。〕

曈圆者其机深於城域,堂露者厥子乃是螟蛉。

〔此为眼盖,圆成者言行深奥,人莫用其探测,故可谓之 枢机於城域。眼堂破露,当养螟蛉之子。〕

犬羊鹅鸭何足算,鸡鼠猴蛇奚可凭。

〔犬眼荒淫,羊眼招祸,鹅鸭之眼不善终。人似鸡鼠猴蛇之目,皆相之贱者,然而察形像应本形者为吉。〕

豕视心圆而无定,狼顾性狠而难名。

〔猪眼朦胧黑白不分,主心术不正,贪而多欲。狼顾者,谓回顾而身不转,性狠常怀杀人害物之心,多为毒害之行,绝

不可交往。〕

后尾有如刀裁, 文斯博雅; 前疃似乎曲钩, 智足经营。

〔目若刀裁,文章自来。眼前涘若曲钩,必能良贾深藏而能规运。〕

惟女赋质,与男异祯。

〔男子以刚为贵,女子以柔为顺。图南曰:阴反於阳,夫必损;阳反於阴,妇必亡。〕

和媚有常者贵重,圆凸不秀者贱轻。

〔男子之目必要神旺,妇人之目必要和惠。若和惠有恒之妇,必当贵重。妇人惟眼长为贵,若园小高凸、粗俗不秀者, 主轻贱之妇。〕

脸薄赤而少节,睛莹澈而多贞。

〔脸者为目盖也。若目盖薄而赤者,主有不廉之行,少有 贞节之懿。睛光澄澈湛然若水者,必有贞烈之性。〕

眼下气青夫必丧,尾后色白男必憎。

〔妇女有青气冲眼者,必丧其夫。眉尾后白色者,夫必憎嫌。〕

三角多嗔,为妨夫之霜刃;四白带杀,作害子之青萍。

〔妇人眼三角者,性狠而多怒,如杀夫之利刃。妇人眼露四白而神旺者,谓之带杀,乃杀子之剑也。青萍,剑名。〕

惟耳者,主声音之听闻,为心肾之司牧;观其形状颜色,见乎休咎荣辱。

〔凡人所言善恶,皆从耳传於心,故为心肾之司牧。耳主心肾,又为禄星。观其耳之形状颜色,则人之休咎荣辱皆可知也。〕

垂珠朝海,必延算以余财;偃月贯轮,终朝王而执玉。 〔耳垂朝口,耳尖贴脑垂肩,必取延年算数,死之后必有 人伦大统赋 10 ·

余财。耳有城廓,如新月偃仰,光莹朝接者,定朝拱天子而为 执玉之臣。〕

圆而成者和惠,偏而缺者惨酷。

〔耳圆成者,主於情和而多惠。偏缺者,必为惨酷之徒。〕 其薄如纸兮贫早死,其坚如木兮老不哭。

〔耳小薄如纸者,则贫寒而早亡。古相云:"耳硬如木,至老不哭。"谓多吉少凶也。〕

白或过面,主声誉之飞腾;莹且如轮,主信行之敦笃。

〔古相云:"耳白过面,名扬四海。"耳轮廓如玉之光莹 贯轮者,主忠信笃厚。〕

似猪者不聪而贪婪,加鼠者好疑而积蓄。

〔猪耳大,龙耳小,只要轮廓分明。大无轮廓又无垂珠,谓之猪耳,则人多愚钝性多贪婪。鼠耳本小,有廓无轮,似鼠耳之人,作事多疑而能积蓄。〕

轮靥虽明,假学则贵;孔毛能长,善持不覆。

〔耳轮有靥而明,当假学而后显贵。耳生毫者,乃寿考之相,善持守而不致颠危。〕

性谲诈而难测,盖为如猴;粮匮乏而靡充,率由似鹿。

〔猴耳尖而向前,耳门窄下,故人莫能测其心也。粮饷匮 乏尚能与朋友同用而无憾者,盖以耳之似鹿,由鹿有呼群之义 故也。〕

薄而向前, 卖尽田园; 反而倒后, 居无室屋。

〔鬼眼云:"耳薄向前,破尽田园。"耳若反轮而后倒, 耳珠又不朝海者,则贫无居室。〕

昏暗难议乎登第,焦枯屡叹其空轴。

〔耳为禄星,其耳昏暗者为禄星不明,则当为寒士,终无禄位。耳主其肾,若耳色焦枯者,为肾气不足,主家首贫穷。

人伦大统赋 11.

轴,卷轴也。空轴言腹中空洞无物。〕

寿越眉兮贵璟血,聪明润兮富贴肉。

〔寿长者耳过於眉,位高者色鲜禋血。聪明之人耳色明润, 殷富之人耳必贴肉。〕

轮靥生乎黑子,智足经邦;门户起乎匿犀,功当剖竹。 —其耳前轮靥生黑子者,可为兴邦智略之臣。耳门骨藏丰满者,谓之匿犀,当为封爵之臣。〕 人伦大统赋 · 12 ·

卷下

惟鼻者,号嵩岳以居中,为天柱而高矗。

〔鼻为嵩岳,以鼻中央为天柱而高接天庭。

梁贵乎丰隆实贯额,色贵乎莹光溢目。

其鼻所贵,惟在高隆贯额。色之所贵,在乎莹光温润而能溢目。 〕

窍小慳劣,头低孤独。

〔鼻孔小者,为目闭不通,其性多慳劣。凡人准头低者, 主终身无子,孤独之相。〕

斜如芟藕之状,困乏瓶储;圆若悬胆之形,荣食鼎旂。

[鼻昂露如芟藕之状者,家贫困乏,衣食不赡。鼻准完美,势若悬瞻者,荣食鼎禄。]

青黑多凶,黄明广福。

〔鼻乃身之主,若气色青黑者,应遭不测之祸;如其色之 黄明,福自至也。〕

柱缺终身难荐鹗,梁断三十当畏鹏。

〔天柱必要端直,若有缺陷则终当困滞,不得腾踏上进。 鹏乃不祥鸟,人见之死亡。汉贾谊三十毕而见此鸟,知必死, 故作《鵩鸟赋》。〕

大而滞者为商旅,小而狭者作僮仆。

[其鼻大而滞者,则为商贾之人,终身奔波流落。凡鼻小

人伦大统赋 13・

而狭者,则早离父母,必作僮仆。相曰:山根断而幼年疾苦为 僮仆。〕

极贵之色似老蚕之光明,下愚之人若蜣 之局促。

〔相曰:蚕将老,自饲而明,然后通於周体。人将发,自 准而明,然后通於诸部。故人将贵,显著见青龙之气,似老蚕 黄明之色,乃为极贵之光,则无不利也。下愚之人,鼻短低凹 若蜣 局促。相曰:面短贫贱人相貌,鼻短无梁露齿牙。〕

完美宜官,破露忧狱。

〔其鼻完美成就者,宜享官禄。若破露无势者,则平生忧苦,多致牢狱之囚。〕

准头隆者诚信,法令深者严肃。

〔夫准头者,为面部之标本。准头高隆,其人诚恳而而笃信。法令乃鼻之左右纹也,若其纹理深长者,为人敦重严肃, 又有遐龄之寿。〕

疾病尖薄, 慳吝小缩。

〔鼻尖而薄者,一生多病。兰台小缩者,其性慳。〕兰台明兮庭旅实,井灶露兮厨无粟。

〔兰台、廷尉,福德宫也。若兰台丰明者,家财殷实而多储积,能赡百人。井灶若露不收者,当庖厨空乏,恒无自赡之食。相曰:鼻露窍,无归著。〕

骨如横起,忌与结於交朋;纹若乱交,慎勿为其眷属。

〔鼻骨横起者,甚不可相亲而为友。鼻上纹理乱交者,必 诡行,虽父子不同其心。若女子者,不可为之眷属。〕

夫人中者,沟洫之态,深则疏通,浅则迟延。

〔人中者,若大川之沟洫,清流四渎,潮接归海,宜其宽深而长也。深则必致亨通,浅则应当困滞。〕

浅短绝嗣而夭命,深长宜子以遐年。

人伦大统赋 · 14 ·

〔如其人中浅短者,绝嗣夭命。若得深长者,宜其子孙富贵,又当寿考。〕

黑子难产乎蓐上,横纹殍卒於道傍。

〔凡人中者,月孛也。若人中有靥者,主其母产之难。若 有横纹截断,必当饿死於途中。〕

上狭下广兮多后旺,下狭上广兮屡孤眠。

〔若人中上窄下宽者,主晚年发禄,子孙成群。如下狭上 阔者,多为鳏孤之人。〕

深长者诚信著,宽厚者功名先。

〔深长者著有诚信,宽阔者早立功名。〕

微如一线之文,身填沟壑;明由破竹之仰,家世貂蝉。

〔但人中微窄,如线之纹痕,主死填於沟壑之间。若如破竹之仰,长远有棱理者,则祖庭高贵。〕

唯口者,语言之钥,是非之关。

〔发言为开口之钥,开口则是非无不至也。〕 祸福之所招,利害之所诠。

〔言为祸福之根,祸福乃利害之本。惟其人之所招故言不可不慎也。〕

端厚寡辞者定免乎辱,诽谤多言者必招其愆。

〔古人之辞寡,若能谨慎於寡辞者,定免乎耻辱。诽谤多 言者,谓其专谈人之过恶也。如是之人,必祸咎及身。〕

肥马轻裘,由方成於四字;出将入相,盖大容乎一拳。

〔若乘肥马,衣轻裘者,由其口若四字。出为将帅。入为 宰辅者,盖口大而能容其拳也。〕

唇欲厚,语欲端,音欲朗,色欲鲜。

〔唇贵乎秀厚,语贵乎端严,音贵乎高朗,色贵乎明鲜。〕 上下纹交子孙众,周匝棱利仁信全。 人伦大统赋 . 15 ·

〔唇上下纹交者,子孙甚众。如周回有棱利者,仁信皆全。〕 璟血馀资,似括囊而贫薄;含丹多艺,如吹火以酸寒。

〔唇如禋血者,主有殷富之资。如括囊者,贫寒孤苦。古相云:唇若含丹多技艺,口如吹火必孤寒。〕

合势欲小,开势欲宽;狗贪马馁,鼠谗蜂单。

〔口不欲不收,故合势欲其小,而开势则欲其大也。凡人 食物若似谗狗之狼餐,饿马之喃草,如鼠蜂之偷食,皆下贱之 相也。〕

大言寡信者略绰,无机促龄者偃蹇。

〔如其口略绰不收,唇无棱理者,主自满不谦,凶徒寡信。 唇若偃蹇者,乃无机巧之人,又当夭寿。〕

青黑祸发,黄白病缠。

〔口唇青黑者,恶祸将至。色见黄白者,大病临身。〕 左右纹粗定凶恶,上下急荡多屯。

〔其人之左右有粗纹者,定是凶徒之辈,多遭宪网。急荡 者谓不语而唇自动,多主孤苦之相。〕

如鸟啄者高人终难共处,同剑镡者义士可与交欢。

〔若口如鸟啄者,难与为交。镡者,剑之隔手。同剑镡者, 主有信义,宜与交。〕

惟寿算之先定,以牙齿之可观。

〔其於寿算故为前定,观其牙齿而预可知矣。〕 康宁者齐且密,贱夭者疏不连。

〔康宁之人,其牙齿齐固而密。贱夭者,则稀少而疏。〕 上覆下兮少困,下掩上兮晚鳏。

〔上覆下者幼年困滞,下掩上者晚岁鳏寡。〕 班马文章,白若瓠犀之美;乔松寿考,莹如昆玉之坚。 〔能班固、马迁之文者,其齿牙若瓠犀之白,高贵人也。 人伦大统赋 16.

享王乔、赤松之寿者,其人齿白莹坚,如昆山之美玉也。〕 当门二齿缺,则命蹇於没世;学堂一官全,则闻於普天

〔当门二齿缺者,其命蹇滞,终身困穷。当门二齿为内学堂,若大而明者,主名闻天下。〕

焦黑困乏,鲜明足钱。

〔若其齿牙焦黑者,乏困贫穷。鲜明者,钱财丰足。〕 二十四兮命折,三十六兮寿延。

〔二十四齿疏而不连者,谓之鬼形,主命夭。三十六齿主 长年。〕

尖若立锥,必乏衣食之士;齐如编贝,优登廊庙之贤。

〔齿尖如锥者,必缺衣食。编贝,海物,色白而莹。齿若 齐如编贝,足为贤相以登廊庙。〕

惟舌者,以短少薄钝为下,以长大方利为先。

〔 舌短小薄钝者,为下愚之人。若其长大而方利者,则为 上卿。〕

方长者咳唾成玉,短小者皂隶执鞭。

〔舌方长者,主有才德,文高四海,出语可为珠玉。短小者,俗谓之舌秃,则皂隶执鞭之仆。〕

黑子凶恶,粟粒荣迁。

〔舌上有黑靥者,多为凶恶。有粟粒者,则必居官食禄。〕 黑紫布衣而肘露,鲜明金带而腰悬。

〔舌上色若黯紫之色者,当贫贱露肘。舌若鲜明光莹者,则有腰金之贵。〕

七星理明,可享千钟之禄;三川纹足,必食万户之田。

〔舌上七星靥者,可享千钟之厚禄。舌上有纹如川者,必 享万户之食。〕 允谓瘦人项短致灾殃,肥人项长必夭横。

〔瘦人本宜项长而项短者,决致灾祸。肥人本宜项短而项 长者,必当横夭。〕

如罂如瓶总非吉,似鹅似豕皆不令。

〔罂、瓶皆瓦器也,项下垂若器者凶。鹅项太长,猪项太短,如是之人,皆主恶死,不善终也。〕

丰圆厚实多财产,光隆温润足权柄。

〔项若丰圆厚实与背相称者,财产多而富足。其光隆温润者,足主枢机重柄。〕

瘦人结喉身孤兆,肥人结喉刑克证。

〔瘦人结喉者,身必孤独。肥人结喉者,必遭刑害。〕 项后丰起,定为厚福之人;颔下绦垂,永保遐龄之庆。

〔项后骨丰而起者,是为厚福。颔下余绦双垂者,永保遐龄之寿。〕

夫贵背之丰隆,身乃恃而安定。

[夫人之背贵於丰隆, 必以体之上下安恃而为可称。] 贫夭绝嗣者偏侧欹斜, 富贵有后者阔厚平正。

〔贫穷寿夭无后者,盖为背之偏侧,欹斜不正。富贵有后者,则背阔泽润,坚厚而平。〕

势若踞山之蹲虎,利宾於王;形如出海之伏龟,考终厥 命。

〔背势似山中坐虎有威力者,当利宾於王,足为王佐。背如出海之龟,则考终寿命。〕

龙骨欲长而充实,虎骨欲短而坚硬。

〔龙骨者臂,虎骨者膊,上为君,下为臣。上壮下细者龙 吞虎,下壮上细者虎吞龙也。〕

瑀肩者腾上必速,恐不多时;犀膊者为儒早亨,优於从

人伦大统赋 · 18 ·

政。

〔 矰鸟之肩者,腾上迅速,早而困乏,故马周矰肩火色,任之要职,壮岁辞闲,急流勇退。为人犀膊丰而圆厚,则为文明之士,幼达长於大政。〕

指节欲其纤直,腕节欲其圆劲。

[手指欲纤而长,腕节欲圆而劲。]

厚而密者谋必有得,薄而疏者心多不称。

〔掌中丰厚而柔,指节莹光而密者,则足智多谋。如其掌薄骨硬,指节疏露者,平生智多不遂。〕

势若排竿富可羡,色如璟血贵可竞。

〔指节若排笋者,身必贵显。其掌如 血者,家必殷富。〕 身卑才薄,涉中满而起倾;禄厚官荣,有驷马之形胜。

〔若掌中心薄,周围起骨,谓之起倾。如是之人,主卑贱 寡学。官禄荣高,谓掌中有印旗之形。〕

横纹下愚,纵理慧性。

〔凡人掌中若有横纹而短者,乃为下愚。如有纹纵者,至 聪明而多智慧。〕

骨露筋浮者主身贱,皮坚肉枯者愁囊罄。

〔手若露骨浮筋,主身贫下贱。若皮坚硬肉乾涩者,当愁 囊箧空乏。〕

家殷而黑子斯明,用足而横纹乃互。

〔手中黑子,主家豪富。如有横纹通直者,为握刀之纹,则主财丰富足。〕

富贵之相若苔之滑而绵之软,寿安之人如荀之直而玉之莹。

〔富贵贤明之士,手滑软而若苔若绵。康宁遐龄之人,手 直如惸而白如玉。〕 人伦大统赋 · 19 ·

心宰视听,内主魂魄,帅六腑之气,统五脏之神。

〔心乃神之主也,掌其视听,运行百脉之神,制五脏六腑之神,故《内经》曰:心为君主之官,神明生焉。〕 颜色始变,是非已分。

〔凡人颜色喜怒方有所变,则一心之明鉴而能预知之。〕恶则祸结,善则福臻。

〔人之所行善恶,咸发之於心。若其行恶,则祸结。若其 行善,则福应。〕

胸凸者燥而多劣,毛长者刚而好嗔。

〔胸膺骨高起者,主性急燥而多劣。若其生毛者,每多轻怒,此皆不仁,寡合之相也。〕

坑陷浅窄愚暗而多居下贱,宽平博厚贤明而早厕缙绅。

〔胸贵平阔,若坑陷浅窄者,多为愚下之流。若其宽平博厚者,则幼年而居官明贤而享禄。〕

腹为水谷之海,脐为筋脉之源,包万物而独化,总六腑 以中轮。

〔腹为水谷之海,脐者总六腑以居中,以为筋脉之源,由 是腹肚大而圆,脐必广而深。相曰:腹大垂囊,食禄无疆。〕 圆厚富安俭薄乏食,深宽富贵浅窄孤贫。

〔腹若圆大而厚者,主家富安闲。如戎腹薄而俭小者,必至乏食。腹宽厚者,主能容物。富贵浅薄窄狭者,褊急孤寒。〕

势若垂囊,风雷四方之震;深能容李,芝兰千里之闻。

〔腹垂若囊,主声名冠世,如风雷震於四方。脐深广能容 夫李者,主美誉播於邦几之外,若兰之馨香闻於四远,言其美 德之盛也。〕

足者枝之谓,身者干之云,枝以蔽其干,足以运诸身。

人伦大统赋 · 20 ·

〔足为枝也,身乃干也,枝当荫其干,足可运之身。〕 丰厚方正者多闲暇,薄涩横窄者必苦辛。

〔足若丰厚方正者,平生闲乐,其禄自至。若人足之薄窄 枯涩,必当辛苦终身。〕

无纹身贱,有毛家温。

〔足底无纹者,身必贫贱。若其足面有毛者,家必殷实。〕 家富累千金,盖有弓刀之理;官高封一品,由成鱼鸟之 纹。

〔家积千金之富者,足底有弓刀之纹理。官至一品之极者, 足底有鱼鸟之成纹。〕

短小精悍者,形不足而神有余;长大孱弱者,形有馀而 神不足。

〔人身短小精悍者,盖其形虽不足,神乃有余。若身长大 孱弱者,是形有余而神不足也。〕

伊形神而俱妙,非贤圣其孰能。

〔形者发乎外,神者藏於内。其形神俱妙者,非贤圣孰能得之。〕

藏於内者如渊珠之粹,发乎外者若焰光之烛。

〔神藏於内者,如渊水骊珠之精粹。神发乎外者,若清夜 焰烛之美光。〕

善恶在人之憎爱,清浊由目之照瞩。

〔凡人心之美恶,皆著於目。美则人爱,恶则人憎,分明 清浊,瞻视是也。〕

质以气而宏充,气以神而化育。

〔 质者形也,人之以气而养形,故以神而生气。〕 质宽则气宏而大,神安则气静而覆。

[人形体宽大,则心气宏。若其神之所安,则气顺而能静。]

人伦大统赋 21.

如是宠辱不足惊,喜怒不足触。

〔人之所养,气定而后形固,形固而后神全,神全而后心 正,诚能有之则宠辱不惊,喜怒不触。

有气无肉者,譬若寒松;有肉无气者,犹如蠹木。

〔人之形体,牴瘦而有神气者,譬若寒松之坚,可享其寿。 如其形体肥而无神气者,犹似虫之蠢木,故枯朽而速败也。〕 李峤耳息而享百龄,孟轲内养而轻万斛。

〔龟息者气自耳出,故享其寿。李峤耳中出息,享遐龄之寿。孟子善养浩然之气,虽齐宣王授以万钟之禄,不顾也。〕和柔刚正之谓君子,狭隘急暴之谓士卒。

[气和宽刚正为君子,气狭隘急暴为士卒。] 如龟之息兮保其远大,如马之驭兮重其驰逐。

〔龟息之细,渺然不闻,盖能如龟息者,可保长年之气。 若如马之驭驾者,生平有驰逐之劳重者,辛苦百般。〕

身大音小褐所隐,身小音大福所伏。

〔身大音小者,形声不相应,故隐其祸而待其发。身小音大,神气有余,故藏其福而待其时。〕

夫声音之所发自元宫而乃臻,与心气以相续。

〔声音之发,起於丹田,与心气相续而出也。〕

琅然其若击石,旷然其若呼谷,斯乃内蕴道德,终应戬谷。

〔声清则琅然若击磬之音,声浊则旷然如呼幽谷之奥,此谓内怀道德之人,终当享其厚禄。〕

谓之罗网者,乾湿不齐。谓之雌雄者,大小相续。或先 急而后缓,或先缓而后速。是为粗俗之卑冗,焉遂风云之志欲。

〔声音有乾润,出而不等。若声大声小相续乱出,或先急 而后缓,或先缓而后急,皆为粗俗卑下之徒。〕 人伦大统赋 · 22 ·

辨四时之气,如春蚕吐丝之微微;察五方之色,如浮云 覆日之旭旭。

〔辨青白红黑,岂四时之正气也。在於皮上者谓之色,皮里者谓之气。气者如粟、如豆、如丝、如发,藏於纹理之中, 隐於发毛之内。细者若春蚕之丝,欲察五方,正如浮云覆日之 微。〕

地阁明而饶田宅,天岳暗而罹桎梏。

〔地阁光明者,田宅多广。天岳昏暗者,刑狱多忧。〕 粟黄缯紫多豪贵,脂白晙青合贤淑。

〔粟黄者,如粟粒之点娇黄也。缯紫者,如紫线之乱盘也。 是为青龙之气,若面部四时常见者,乃豪贵之人。人之面色其 白若脂,其青若曌者,廊庙之器。〕

若相者,精究其术,而妙悟於神,安逃祸福。

〔若学相者,能细究此书,而得其神妙,则祸福无逃也。〕

〔歌曰:嗟嗟世俗不知因,妄将容貌取其形。若得正形为大贵,依稀相似出群伦。形滞之人行必失,神滞之人心不开,气滞之人言必懒,色滞之人面尘埃。形神气色都无滞,举事心谋百事谐。色在皮而气在血,脉聚作成多喜悦。散则成忧静则安,部位吉凶皆有诀。又曰:欲穷祸福贵贱,除观诸家相文,听声观形察色,有肉神、音神、眼神、总欲观之,则自然明矣。又曰:迷而不反,祸从惑起,灾自奢生。老子曰:天之道利而不害,圣人之道为而不争。此之谓也。〕